



Silvia, par onorâ l'inovâl dal Centenari de Vuere

Grande dal 1915 al '18, e veve puartât la sô classe di arlêfs de Scuele Mezane a fâ un percors sul teritori che al jere stât teatri di chê tragjediè.

E veve sintût contâ in famee la storie dai nonos bis che a vevin combatût in chê vuere. Nono Pieri al jere lâât soldât di chê altre bande, ven a stâi sot l'Imperi Austriac cuant che dut il Friûl di soreli jevât al jere ancjemò sot chel domini.

Lui insieme a altris doi fradis, di pôc plui di vincj agns, a jerin stâts mandâts a combati in Galizie.

A vevin lassât a cjase lis feminis sosis cui frutins di tirâ sù.

Di lôr trê, dome il nono Pieri al jere tornât, i fradis Zuan e Rico a jerin dispierdûts.

Pieri al jere stât ferît intune gjambe e par chel al çuetave e nol veve plui podût lâ a lavorâ tai cjamps come prime, ma si limitave a lâ te stale a regolâ e curâ i nemâi.

La prime robe che al veve fat e jere di pensâ a lis zovinis veduis dai fradis, lis veve clamadis a vivi cun lôr tal grant cjasâl cui frutins che al veve tirât sù fasint di pari a ducj, sîs di plui dai cuatri che al veve za lui. Cheste e jere la storie dal nono Pieri che al veve combatût sot l'Imperi Asburgjic, tornât ferît e cence medais.

Divierse e jere la storie dal nono Medeo che invezit, furlan de Basse di là da la aghe, za sot de Italie, al veve cjapât la cartuline di lâ soldât tant che al studiave a Padue.

Dopo vê passât il cors di adestrament lu vevin mandât su la Plâf là che e jere la ofensive che e varès puartât i Talians fin a Triest. Di li e jere scomençade la bataie plui dure cuintri un nemì che al stentave a cedi, ma za scunît di fam e malatiis. Dal '17 al '18 Medeo si veve fat onôr pal so coragjo, simpri in prime linee. Duncje al veve vût onôr e decorazions insieme a lis feridis.

La coriere ju puartave fin a Sante Marie la Lungje intune biele zornade di Jugn, a jerin lis

ultimis setemanis di scuele prin des vacancis.

Silvia no voleve contâur la storie de vuere ma la storie de int che e veve patît la vuere. Testemoneancis vivudis de int partint dal bas. Sul front dal Lusing e restave dome ruine, massacrât di lunc e par traviers, dopo chei trê agns di plomp che a vevin lassât dulintor dome dolôr e distruzion. I cadavars dai muarts si contavin a miârs in muel tal pantan des trinceis.

Dopo une soste a Sante Marie La Lungje la coriere e veve proseguît viers Gardiscje dal Lusing, sul puint di Sagrât passant sul flum indarintât di lûs, par rivâ a Redipulie. La grande scjalinade di marmul blanc e incuteve rispjet e ducj a lavin a lei i nons dai zovins soldâts che là a vevin lassât il sium di une vite crevade. Alore Silvia si rivolzeve ai siei arlêfs.

“Us doi un compit par doman. Di scrivi alc su cheste zornade par memoreâ la Vuere Grande, ce che us à lassât cheste visite sui lûcs de memorie. O podês scrivi un teme, une riflessione, ma ancje se o volês fâ un disegn.” Tal doman durant la lezion Silvia e veve ritirât i lavôrs dai arlêfs.

Ducj a vevin scrit alc e dome un al veve fat un disegn.

Il disegn al presentave un cjamp di forment cun tancj papavars ros e barburicis, i colôrs a risaltavin tal aur dal forment. Michele i diseve che passant cu la coriere al jere stât colpît de imagjin dal cjamp e lu veve fotografât cul telefonin e dopo a cjase al veve fat il disegn.

Silvia alore i domandave cuâl che al jere il messaç.

Michele i rispuindeve cussì: “Il ros dai papavars al è il sanc des feridis, lis barburicis a son lis lagrimis e il forment al è la vite”.

*di Egle Taverna*